

樵

風

樂

府

瘦碧詞序

國朝肇興文學武功竝盛自天潢以訖蘭錡  
傳詩者亡慮千數至填詞則二百數十年僅  
成德容若承齡子受兩家豈其道博壹要眇  
爲造物所靳故鮮能工抑審音定律其事甚  
難山澤之癯或擅厥長而爲舉世之所廢歟  
叔問家世蘭錡累葉通顯先德清芬不異寒  
峻門生故吏託蔭烜赫或相招要去之若浼  
憑藉雖高睨青雲而不赴樂貧不改寂朱門  
而自賀以貴公子孫羈滯吳下姿格散朗神

思蕭間雖陳蕃解榻北海標門怡然嘯傲玉  
暉霞舉塵纓俗組染迹而化經籍窅奧曰寓  
卽解文章恢麗駿乎范沈嘗究音呂頗喜爲  
詞所得輒經奇固多淒異之響而夷猶澹遠  
清曠騷雅怨而不怒哀而不傷故嘗論其身  
世微類玉田其人與詞則雅近清真白石余  
與君鄉舉齊年俱在弱冠迨遇江表忽及壯  
齡兩人者卓犖偏世皆有遺天下輕萬物之  
心閱世寢深傷於哀樂且以承平年少胥疏  
江湖行吟菰蒲之中與漚鷺爲伍淒寒感人

又嘗讀書傳慕古高人烈士若范蠡梁鴻要  
離者流而吳中多有其蹟相與選屐拏櫂旁  
皇求索於無人之境呼歎精靈悅與晤言昔  
人謂滯其所資之累擁其所適之性者吾兩  
人非邪君詞體潔旨遠句妍韻美以爲詩樂  
失傳詞延一綫宋暢其本根元亡於歧路自  
後南北作者率以短聲逞其纖筆安蔽乖方  
汔今益靡靡而不可紀君才力雄獨進復古  
音少作琴言一卷以傷綺棄之旣別一年始  
栞瘦碧詞二卷郵寄示余其追擲兩宋精辨

七始挾敷睇奧梳節披奏聽於無聲眇忽成  
律使樂官比響不累於詠歌文士摘華靡淆  
於絃笛故能鬱伊善感和平蕩聽淪淪洋洋  
契靈樂祖容若子受固將愧其前轍者也余  
嘗舉似君詞之爲道言外意內哀樂橫生涕  
关交沸百靈奔赴萬感未會邈接神思妙遺  
言詮今君審律如此其力足以破造物之所  
靳其才足以興舉世之所廢矣漢壽易順鼎  
實父敘於大梁

元明以來詞學衰息迨

本朝萬氏詞律出而后人知詞之不可無律然萬氏止取諸名家之詞排比以求其律而律之原固未之知也戈順卿氏踵其後似視萬氏所得有進矣乃戈氏深於律而不甚工於詞讀其詞者惜焉夫律之不知固不足言詞而詞之不工又何以律爲高密鄭小坡孝廉精於詞律深明管絃聲數之異同上以攷古燕樂之舊謹姜白石自製曲其字旁所記音拍皆能以意通之余嘗戲謂君眞得不傳之秘於遺文者也乃其所爲詞又何其清麗

婉約而情文相生歟如繞佛閣壽樓春諸調  
皆不易作而誦之抑揚頓挫淪淪移人豈非  
深於律而又工於詞者乎小坡爲吾故人蘭  
坡中丞之子顧以承平故家貴遊年少而澹  
於名利牢落不偶喜吳中湖山風月之勝僑  
居久之日與二三名俊雲唱雪和陶寫性靈  
余每入其室左琴右書一鶴翔舞其間超然  
有人外之致宜其詞之工矣光緒十四年歲  
在戊子仲冬之月曲園居士俞樾

冷紅詞序

未問居士宏博精敏著書滿家出其緒餘尤  
長倚聲同時詞流如中實夢湘未之或先也  
夫詞非聲也而託於聲自制氏云徂采風不  
下協律之事蓋寡諷諭之道忽焉居士於詞  
導源樂府振騷雅於微言掩周姜而孤上余  
讀而愛之未嘗釋手于時公車麇集廣陌塵  
喧薊城之榆莢晨飛燕池之柳條晚綠訪東  
京之舊事惟餘夢華過通德之高門先知世  
學投轄留飲刻燭分題舉東海以爲栢指西  
山而送嘯有慙蓬蓽託植修麻生長菹蘭非



無襍佩然且飾無鹽而齊姝女引牛鐸以應  
黃鍾略仿鏗鎗無嫌唐突居士嗟嗟若未遑  
也旣而謂余果知詞者自茲已往季與志迫  
哀與樂盈名惡乎修情惡乎正邪余曰不嘖  
是誠在我夫言以足志樂以宣滯世莫我知  
而無悶之誼明天下宗子故棲棲之行苦然  
內切情於孤吟則體充矣外取感於同聲則  
道宏矣今居士發言芬悱按拍厲清寄窈窕  
之深哀諧聲文於浩倡詞雖小道必有可觀  
綜厥生平抑又末已方與子嬋絕語言愒陰

畏壘江南罷弄蒼梧不啻豕使夫誨淫之子  
矜其側豔齷性之夫騰其詼啁俗儒雞駭蔽  
所未見是以紅友斷斷於技雠皋文臨簡而  
鄭重誠恥之也武陵陳銳甲午立夏篝鐙寫  
訖

比竹餘音序

往昔鄧辛眉從孫月坡學詞鄧父語余曰詞  
能幽人使志不申非壯夫之事盛世之音也  
余竊笑焉以爲才人固甘於寂寞傳世無怨  
於涼獨使我登台鼎不如一清吟遠矣特病

不工詞不恨窮而工也未三五年天下大亂  
曩之公卿多福壽者相繼傾覆而詞客楚士  
流轉兵間憔悴行歌不妨其樂余亦漸收攝  
壯志時一曼聲旣患學者粗率頗教以詞律  
東南底定海氛未起於天津行轅得見叔問  
中書叔問貴公子不樂仕進乞食吳門與一  
時名士游文章爾雅藝事多能而尤工倚聲  
吳門孫君故國也前五十年孫君與如冠九  
以詞唱和於潯陽廬山間佳句猶在人口冠  
九則叔問鄉前輩再前則成容若湛淪盛時

而詞冠本朝鄧丈所言吁其驗矣余交叔問  
又將廿年而時事愈變吳越海疆不能有歌  
舞湖山之樂余居三閩之徂土無公子之離  
憂樵唱田歌一銷綺思窮則至矣詞於何有  
鄧丈之言其猶衰世之盛耶叔問遠來徵文  
輒述師友身世之感以告之時光緒壬寅夏  
四月五日王闓運題於長沙城中湘綺樓

樵風樂府卷一

高密鄭文焯叔問

齊天樂

登虞山興福寺樓

夕陽呼酒登臨地尊前故人還是水國無花  
山城自綠望轉征蓬千里行歌倦矣更一片  
秋魂亂雲扶起醉袖飄蕭海風吹下劒花細  
天涯此樓似寄畫闌零落處都爲愁倚佛  
鼓荒壇神鴉廢社今古蒼茫煙水吳絲漫理  
正波上鴻飛數峰清異坐盡林陰甚時重夢

至

蹋莎行

重別次湘和白石道人江上感夢之作  
官閣煙寒客帆風軟吟邊屬景愁邊見歸心  
爭共蜀雲飛夢痕總被吳波染殘酒單衣  
殘燈淚綫亂山挂雨尊前遠江南水闊別離  
多斷魂分付孤舟管

湘月

山塘秋集分題得壞塔

夜鈴語斷更斜陽瘦影誰問今古獨立蒼茫

鎮占老一角青山無主衰草叢生枯楓倒出  
時見歸禽度殘烽零劫仗他半壁支柱長  
見峭倚荒天淒涼如筆寫愁邊風雨不許登  
臨怕倦客題徧傷心秋句卧影空丘招魂破  
寺牘有孤雲駐夢痕飛上故王臺榭何處

八聲甘州

西樓九日

喚吟邊瘦月替珠燈扶魂上西樓歎芳時俊  
侶尊前掇送墜夢難收又是黃華勸客須插  
少年頭一夜涼風思綠減汀洲笛外亂峰

無語甚秋腸寸裂還聽吹秋想湖亭多宴歌  
淚迸波流自銷凝斷襟零佩賸水雲冷社兩  
三鷗休重倚畫闌高處殘醉題愁

虞美人

斷魂空畫相思影細語成悽哽鸚哥猶喚舊  
坊名幾度尋春簾幕誤人迎年時繫馬門  
前柳樹更如腰瘦月隴懸淚夜盈盈長見小  
樓圓夢到天明

摸魚兒

金山留雲亭餞仲復撫部酒半聞江上



笛聲起於亂煙衰柳間感音而作不自  
覺其辭之掩抑也

渺吳天覓愁無地江山如此誰醒亂雲空逐  
驚濤去人共一亭幽靜斜月耿怕重見青尊  
中有滄桑影吟魂自警對潮打孤城煙生壞  
塔笛語夜淒哽招提境還作東門帳飲中  
流同是漂梗當年擊楫英雄老輪與過江魚  
艇愁暗省換滿日胡沙蠻氣連天迴苔茵坐  
冷任怪石能言荒波變酒莫更賦離景

東風第一枝

和梅谿春雪韻

玉鬪新梅珠敲暗竹江春半釀寒暖粉雲幾  
處愁深素波者番恨淺尋香舊徑趁細屨弓  
痕輕輦怕笛邊誤約飛花閣住小簾歸燕  
沙草際漸迷望眼風絮裏暗銷醉面乍看舞  
鶴閒庭又尋印鴻故苑吳篷誰倚畫澹遠山  
眉如綫更鏡娥含淚窺人夢想縞衣重見

右瘦碧詞舊刻二卷凡六十七首刪存  
七首

樵風樂府卷二

高密鄭文焯叔問

菩薩蠻

宮花不見人憔悴  
朝朝洗面燕支淚  
樓閣易斜暉  
綠塵箏雁飛  
空階銷玉冷  
燕立秋千影  
隔院騎聲來  
卧屏紅扇開

晚紅秋冷夫容苑  
鴛鴦頭白花應見  
山黛可憐顰  
故宮眉樣新  
有人妝澹薄  
綰袂垂深幕  
青鳥驀飛來  
報君雙鳳釵

畫樓殘點和簫咽  
鏡中愁見人如月  
雙陸賭

金鑲別時相贈難  
舊紅寬臂縷妝罷長無  
語明日鬪花風爲誰梳洗濃

年年織錦紅窗老繡裙空染南園草夢裏送  
香車好春歸別家  
手栽池上樹難繫斑騅  
駐悔不種夫容花時還妒儂

移家愛住青溪裏東風綠盡前裙水殘雪驛  
橋西淺深郎馬蹏  
花前和淚送鸞帶行煙  
重夢斷錦衾知曉寒孤起時

瑤臺長是遊仙駐殘金銷盡雕輪路帳殿柳  
如煙水漂花滿船  
驚波風雨急夜夜青禽

泣只道海能填西山無石銜

過花簾燕驚紅落一牀殘夢東風薄春老不  
還家刺桐牆外花 江南沙草暖鏡水歌眉  
淺雙笛出煙蘿畫船涼月多

平江風色連三月酒醒又近紅樓別獨自莫  
傷春新年見舊人 安排雙淚眼長送春歸  
晚斜月過西池隔闌花自移

惜秋華

惠山

輭繡山街翠溶溶一鏡秋妝環照向晚畫船

相將載愁多少夫容不管唳紅暗墜落煙輕  
波小淒涼正斜陽送客湖亭重到 仙夢絳  
都杳記鐙簾俊語鳳鬟香裊問紫曲誰解憶  
聽歌人老而今白石清泉倚玉瓶亂峰如笑  
幽悄誤夢尋燕昏鶯曉

留春令

中秋夜紅樓離席

鏡華空滿怨紅都在舊時羅帕早是銷凝淚  
無多怎留向臨歧灑 枕上陽關催夙駕忍  
今宵歌罷從此西樓翠尊空願明月無圓夜

點絳脣

西樓感夢

秋館黃昏小風香陣欺翳蜨近霜花葉著意  
紅雙疊 多少新愁夜夜西樓月傷今別月  
圓時節長是佳期闕

虞美人

鏡屏香冷夫容薦花趁人凝澹問誰下馬看  
梳頭長是畫簾高捲卧清秋 宿妝留得新  
眉在人意依前改一溝脂水繞樓東中有幾  
行閒淚往來紅

瑞龍吟

春怨用清真體

橫塘道還記碎鏡流花斷  
裙黏草多情三百  
紅闌爲誰約住東風不到  
曠吟眺休問玉  
梅門巷舊家英妙而今著  
破春衫唾華淚粉  
銷凝滿抱 依黯殘雲心事  
過江如夢清歌  
催老惟有酒邊青山曾見  
年少狂香豔迹零  
落蘭成橐無人聽西園冷  
詠南樓清歡料理  
傷春早幾回付與鶯沈燕  
悄爭說還鄉好離  
笛怨歸魂將花千繞夕陽  
故國曲中人杳



芳草渡

江南早春重遇中實感夢而作

昨夢裏見別後湘皋又生蘭芷正夜窗愁雨  
燈花報有人至怊悵攜手地銷年華多麗水  
驛晚省是重逢各自憔悴慵倚畫闌缺處  
猶有傷春當日淚曠吟望吳雲斷草萋萋恨  
千里亂山側帽算楚客舊狂能理展醉眼一  
笑尊前老矣

一萼紅

光緒壬辰人日用石帚滄熙丙午人日

詞韻題其西湖遺象

石湖陰想梅邊墮翠曾上小紅簪經醉殘山  
傷春舊月無奈風過簫沈漫回首垂虹載雪  
喚夢醒空有繞枝禽笠澤煙寒玉峰雲暗悽  
絕重臨 賓主百年無幾問浮湘入沔去住  
何心南渡風流東州雅舊遺事休更追尋算  
歌曲江湖送老抵當時鍋裏幾銷金待訪城  
西馬塍只見花深

玉樓春

梅花過了仍風雨著意傷春天不許西園詞

酒去年同別是一番惆悵處  
一枝照水渾無語日見花飛隨水去  
斷紅還逐晚潮同相映  
枝頭紅更苦

因循遊計春過半幾度黃昏歌酒散  
此時淚眼向花枝不待飄零腸已斷  
舊遊臺榭年芳換卻爲傷高  
重倚徧水幫油幕趁清明招得春魂何處見

遊絲抵死依風轉繞徧天涯猶恨短  
一春醉夢誤人歸殘酒醒時春又晚  
笑聲誰在秋千半蹴起飛花紅一片  
銜花燕子不知愁暗

度芳心過別院

曉鶯簾外嘯紅處明月不留花影住起來弄  
笛過西橋宿粉狂香吹滿路 路人不惜春  
心苦貪逐韶光過百五杏牆殘萼待歸簪深  
雨閉門花亂舞

浣溪紗

清明載酒山塘重記所見

花氣溫溫趁艣柔禁煙晴晝水如油酒邊殘  
夢十三樓 暫見不如成久別舊歡無計破  
新愁來時春草去時秋

斜日朱樓對捲簾  
笛中人意柳纖纖  
亂絲著地被愁黏  
花影蹋歌紅步障  
水香試酒白涼衫  
一春費淚與江南

池館新晴語細禽  
墮釵曾傍藥闌陰  
經年同夢不同心  
近水吹香春澹薄  
移花步影夜清沈  
月圓時節到而今

拂水東風劇有情  
柳花當面化流萍  
天涯吟鬢幾時青  
殘燭已銷無用淚  
清歌猶作奈何聲  
西樓人去恨長醒

蹋莎行

雨意垂垂春事道盡紅樓曲餞爰託於  
音

蘭氣疏襟竹聲涼幕卧枝紅裊金釵落五更  
殘雨酒醒時羅衾正似人情薄 帳燭香銷  
琴尊淚閣夢來眞悔重逢錯去年花落舊亭  
臺西風不減東風惡

采桑子

凭高滿面東風淚獨立江亭流水歌聲銷盡  
年涯不暫停 歸來自掩香屏卧殘月新鶯  
夢好須驚知是傷春第幾生

銷魂最是皋橋水花雨冥冥歌淚盈盈不解  
西流總費聲 畫船煙泊經遊地燈火高城  
絃管殘更無奈明朝酒易醒

三臺令

春雨春雨滴到無聲更苦紅樓酒醒天涯相  
送舟前落花花落花落還較去年輕薄  
春水春水流盡一年花淚綠陰明日池塘可  
待重來斷腸腸斷腸斷殘月茜窗人澹  
拜星月慢

吳俗以中元節賽神虎丘傾城士女彌

日譙歌極畫船簫鼓之盛余落南十四  
年感秋勸遊無復輕詵之樂曩與中實  
兄弟嘗棹烏篷聽歌斟酌橋畔載月而  
歸輒有佳詠清事今廢久矣賦此悄然  
虎氣高秋鴟夷遺恨斷送山塘七里走馬吹  
花帶歌聲流水酒醒處付與黃昏一片燈火  
滿地飄零鈿翠步履人歸總西風憔悴倦  
追尋畫舸魚龍隊中年近早辦登臨淚不見  
柳色蘇臺換秋煙蕭寺墜疏鐘月落城烏起  
扁舟夜暗傍蒹葭樣莫更向碎玉闌干爲傷



高獨倚

玲瓏四犯

壬辰中秋翫月西園中夕再起引侍兒  
阿憐露坐池闌歌白石道人玲瓏雙調  
曲度鐵洞簫繞廊長吟鳴鶴相應夜色  
空寒花葉照地顧景淒獨依依殆不能  
去遂倣姜詞舊譜製此明日示子苾以  
爲有新亭之悲也宋譜雙調煞聲以中  
呂上字爲夾鍾商按詞原律呂四犯夾  
鍾商犯夷則羽爲仙呂調亦中呂上字

住商犯角爲夾鍾閨角歸本宮爲夾鍾  
宮卽中呂宮調也周清真所歌別是大  
石調一曲梅谿草窗並效其體與此不  
同近世詞人樂工莫達斯旨矣

竹響露寒花凝雲澹淒涼今夜如此五湖人  
不見故國空文綺歌殘月明滿地拍危闌寸  
心千里一點秋縈兩行新雁知我倚樓意  
參差玉生涼吹想霓裳譜徧天上清異鏡波  
宮殿影桂老西風裏攜縈夜出長門冷漸銷  
盡銅仙鉛淚愁夢寄花陰見低鬟拜起

木蘭花慢

八月十八日汎月石湖鄰舟感遇

晚涼花積水送秋老越來溪歎故苑滄波汎  
天鏡裏曾見鷗夷淒淒黃昏未了漸歌闌人  
似水東西自有暗香隨袖殘紅爲惜新題  
文漪步綺輕移銀燭背翠尊攜念別後湖山  
幾回同夢雲散鴻飛依依蘭橈醉解琬哢痕  
猶在去年衣明月無多圓夜有情偏向人低  
湘春夜月

最銷魂畫樓西畔黃昏可奈送了斜陽新月

又當門自見海棠初謝算幾番醒醉立盡花  
陰念隔簾半面香酬影答都是離痕哀箏  
自語殘燈在水輕夢如雲鳳帳籠寒空夜夜  
報君紅淚銷黯羅襟蓬山咫尺更爲誰青鳥  
殷勤怕後約誤東風一信香桃瘦損還憶而  
今

樵風樂府卷三

高密鄭文焯叔問

浣溪紗

著酒芳心不自持  
小雲雙枕帶花移  
今年春早夢先知  
梅萼有情紅到骨  
柳條無恨翠舒眉  
水堂新月舊相期

無事傷心獨費情  
落梅風裏掩重扃  
春衣一桁細香零  
詞譜當歌和淚教  
燈窗無睡枕肩聽  
水邊花外雨冥冥

雨霖鈴

甲午人日載雪西崦

江城春霽趁東風  
早畫舸初試歌眉鏡裏仍  
見曾攜手處都縈愁  
思夢換絲華舊恨共明  
月千里但暗憶紅萼盈簪  
玉笛吹寒夜重起  
娃鄉自古銷魂地  
漫倚闌一霎成顚顚  
年  
年虎山橋下花發處  
冷香隨水水縱無情應  
帶傷春幾點清淚算  
只有吟袖弓腰解得流  
連意

玉樓春

春陰多誤花時節  
昨夜東風猶有雪  
那知天

意著詩情新見虎山橋上月 十年舊賞音  
塵絕重賦橫枝和淚折淒清心事付紅簫暗  
惜歌前人近別

木蘭花慢

梁谿晚泊和黃竹齋

問綠汀杜若誰解爲恨人栽歎京袂遊塵吳  
霜歸鬢客悶難排扁舟放愁縱遠好湖山何  
意亂離來斜月還聞鄰笛落花休點吟杯  
水香亭榭憶秦淮歌櫂晚頻催念繡額簾花  
羅心燭燼殘夢徘徊西風謝堂去燕賸巢痕

還占舊樓臺待把錦書寄與柔波九曲腸回  
鶯囀序

甲午仲秋薄遊江淮瓜步晚渡與子苾  
舟中連句和夢窗此曲

西闌乍過桂影倦秋醒閉戶酒邊淚分付黃  
花客燕何意來暮櫂歌遠吳山自碧晴雲望  
轉淮南樹悵荒灣殘柳春前枉作風絮

叔問

寶扇才疏畫簾十二換紗煙縠霧鏡波曉  
還照離妝玉容空在紈素繡帷寒愁鬆雪腕  
暗銷盡深盟紅縷理芳情搓做柔絲綰他閒



鷺子苾

桃根舊曲醉耳重聽過江尙倦旅

歎十載杜郎吟賞又斷魂處翠黯紅淒矮篷  
眠雨二分月色璫簫吹破多情贏得天涯老  
更漁燈趁喚瓜州渡登臨恨晚荒螢亂點迷  
樓照地一片焦土

叔問

春風粉黛曉日綾

紈賸寸蘿片苧笑拾得才人餘唾幾樹官梅  
客裏狂吟雪中低舞扁舟此去無情煙水清  
歌何處催夢覺感華年分算成絃柱隋堤鴉  
散斜陽故國庭花有人唱否

子苾

前調

登北固樓感事再和夢窗

西風又聞鶴唳動秋聲在水海東日照滿津  
亭浪花飛作雲蕊戍笳引樓船暝合荒譙夜  
火城烏墜歎南遊孤旅滄波久斷歸思

叔問

關塞音書數馳急羽感新愁帝子笑仙術  
空說乘槎采芝人久未至莽中原貔貅萬帳  
問何日龍旗東指且銜杯狂嗅茱萸醉來何  
意

子苾

登臨罷酒北顧倉皇念枕戈不寐

霜月悄幾回起舞到此驚見第一江山費人  
清淚神京杳杳非煙非霧雞聲殘夢催哀角

攬迴腸一夜成憔悴冥鴻自遠重攜倦客扁  
舟汎愁鏡波天裏

叔問

燐燐野燒逼射甘

泉照萬松失翠暫小覓林亭同憩側帽行吟  
老柳祠荒亂鴉風起金焦兩點檐牙浮碧空  
梁歸盡遼海燕繞危闌休向曛黃倚傷心大  
樹飄零更戀遺弓恨題滿紙

子苾

### 浣溪紗

#### 秋夜聞隔牆按歌

秋病無名廢酒尊水西亭榭易黃昏獨經遊  
地最銷魂花影自行橋上月笛聲如見曲

中人燕梁何處起清塵

謁金門

煙浪惡花滿海山樓閣遼鶴無書雲漠漠故  
宮春夢薄莫惜舞人零落長袖爲君重著  
墮地鸞釵成密約捧觴干日樂

花窰地紅玉枕山雲膩良夜好天濃睡裏蠟  
盤空轉淚妾似楊花飄墜郎是一江春水  
容易東風無好計少年須著意

釵鳳墜人意不如初會圓月後逢歌舞地斷  
腸明鏡裏早是君心難恃恨不玉顏先悴

恩重嬌多情易費枕函花有淚

浣溪紗

乙未山塘寒食

春半餘寒未減衣綠莎汀漱燕來稀夢期何  
事鎮相違一簇簾花殘月地數行門柳宿  
煙枝畫船燈火夜歸遲

鬪草闌干晚櫂移好風香出畫羅衣隔花臨  
水見腰肢病枕久虛胡蝶夢歌樓猶唱鷓  
鴒詞疏狂多誤少年時

齊天樂

白石碧山詠物之作多取是調託興深  
美因效其體賦蟹

半生諳盡江湖味西風更無腸斷蓼溆衰鎧  
蘆灘短舍夜市秋聲零亂橫行未徧歎身世  
搏沙蜺螺羞伴恨滿吳波歎珠盡作水花散  
彭彭甲兵腹滿待誰呼郭索蠻海秋戰菊  
訊霜肥橙香雪老都付重陽吟琰新詩好換  
憶鄉味經年故溪清淺月落潮生一匡愁碧  
染

鷓鴣天

中秋後二日越來溪夜汎

露脚斜波月上遲鏡中曾見越來時湖光一  
片傷心碧卻與吳兒作水嬉飛畫鷁引金  
蠡羅旂香榦燭龍隨歌塵只是黃昏散愁滿  
風蘿野粉吹

巖桂秋香晚尙花順陽舊墅問殘霞五湖白  
送鵬夷去風月依然屬范家浮白勸比紅

誇有人低唱倚蒹葭曲中解得銷魂句不羨

谿頭越女紗

泊舟行春橋侍兒南柔歌余湘春夜月詞音節淒異

蹋莎行

送子苾入陝

時以庶常改官爲懷遠令

連權湖山對牀風雨吟壇十載更相主已憐  
憔悴盡中年那堪離亂成孤旅鷗外吳雲  
馬頭秦樹大江東去人西去嚴關百二舊經  
行不愁夢失尋君處

壓酒春燈掩歌秋扇江南已是無腸斷曲中  
莫作水風聽尊前便有關山怨經醉池亭  
臨分牋管西園芳草隨人遠黃金縱得贖蛾  
睂胡沙應換春風面

蜀錦裁篇吳皋飄寓佳遊頓失城南侶橋邊



烏鵲縱分飛隴頭鸚鵡能言語 柳雪官程

圖書家具扁舟明日長安路多君一縣好青  
子苾僑吳城南烏鵲橋

山支頤手板供愁句  
南浦蘭情西崦梅詵好春良月離天近十年  
空負過江名一官直抵飛花溷 山縣愁鬢  
雪關衰鬢才人自斷漂零分它時好載鬱林  
歸只應片石銷殘恨

### 湘月

八月十五夜聽雨皋橋水樓憶己丑中  
秋與如閻諸子被酒夜上靈巖最高峯

醉卧琴臺雲氣四合仰見明月破空而  
飛如銅鏡礮石璆然有聲遠望漁火錯  
雜雲水中光景奇絕予踞危石屐步不  
能支捉雲狂呼衣袂盡溼明日題詩寺  
壁而去勿勿十年遊舊二三零落殆盡  
此樂不可復得今夕何夕懷往傷高不  
知酒悲之何從也

桂陰小榭隔紗櫺聽水如坐雲霧細雨檐花  
奈曲裏總是瀟瀟愁緒桐驛初鴻柳橋殘燕  
畫燭裁秋句西闌休倚數峰相對清苦 猶

憶卧酒琴臺磨空一鏡照青山今古塔影蒼  
寒問石上招得秋魂來否蹋葉虛廊采香斷  
徑事與孤雲去淒然良夜夢遊凝想仙侶

慶宮春

重登西樓月下聞雁寄懷湘潭王壬老  
衰草蟲天斷雲魚浪去帆望轉湘碧秋影初  
鴻江蘼罷采月明空怨遙夕翠疏紅冷記曾  
占西樓賦筆雕闌仍在愁倚黃昏水風殘笛  
楚蘭一曲傷心恨魄難招霧蘿煙薜江山  
文藻登臨老淚故國何堪陳迹綺疏芳卷定

寄我寒梅水驛行雲歌盡白眼青天舊狂誰識

鷓鴣天

余往來鄧尉山中廿餘年矣獨愛青芝  
一塢林嶂秀岨人迹罕交有終焉之志  
未逮也還泊西崦因賦是解

樹隱湖光望轉明巖深晚桂尙飄馨十年秋  
鬢輸山綠依舊看山夢裏行 煙澹岩月空  
冥下崦濛雨上崦晴眠雲無地青芝老虛被  
樵漁識姓名

結夢疏雲泛渚蘋霜林秋色豔於春山中種  
樹書堪讀世上繁華迹總陳驚歲晚負閒  
身石芝鶴語舊知津紅桑海畔花爭發一掬  
微波見綠塵

右冷紅詞舊刻四卷始己丑訖丙申凡一  
百四十五首刪存五十六首

樵風樂府卷四

高密鄭文焯叔問

楊柳枝

永豐坊畔翠雙枝和淚移來近玉墀不是傷  
春詞客在故宮誰得妒腰肢

才作風花又水萍一生好計只飄零可憐憔悴  
章臺路送盡離人眼尙青

望江怨

題北樓春餞圖

東風笛惜別殘紅舊衫溼登高懷故國畫簾

飛絮煙江夕空尊泣不見笛中人斷雲和夢  
覓

蘭陵王

江上逢北使寄書和清真

片帆直舂草連江自碧吳亭外飛絮亂鴉冉  
冉離天可憐色青山戀去國應識長安舊客  
歸鴻盡回首暮雲一紙京書淚盈尺 經年  
尙萍迹歎夢墮吟鞭香冷歌席殘花殘酒過  
寒食看十里村杏數行門柳東風吟恨徧水  
驛甚天限南北 幽惻暗懷積念帳鏡塵空

廊廡音寂前遊到處成愁極但逝水光景過  
風簫笛沈沈孤館更夜盡斷漏滴

前調

秋柳和清真

去波直殘柳參差颺碧蘇臺路曾埽墜鈿浣  
地柔條盡秋色依依問水國頻憶長亭送客  
西風裏攜手四橋空綠平添漲三尺春光  
總陳迹記絮裏簾旌花捲帆席汀洲萍實經  
年食嗟兩鬢銀綰一聲金縷離魂飛度遠近  
驛送秋老江北心惻亂愁積奈舞袖飄零



歌扇沈寂相思到骨情何極念馬上殘夢酒  
邊孤笛單衣鉛淚似暗雨夜半滴

蹋莎行

采蓮曲

花券裁紅香筒吹綠輕拏蹋徧江南曲蓮心  
苦裏尙回甘藕絲斷後從誰續 翠帔銀泥  
鈿筐金粟牽雲曳雪相思屬弄波莫便采珠  
還露房秋淚紅盈掬

玉梅令

城南網師小築故瞿氏園也咸豐庚申

亂後中江李使君眉生治園爲宅以近  
滄浪亭號蘇東鄰博古自娛簡敖絕世  
余以疏狂僑舊雅奉閒逸數預竹林之  
游今眉生下世十餘年矣林亭舊隱時  
見官儀賓戲囂塵無復高致感時悼往  
不能無西園之思也園中殿春籜最勝  
因以錢仲文詠故王維堂前芍藥詩意  
寄慨於詞云

滄波舊苑又入清風  
𠂇春陰護傍家池館有  
藥闌幾曲掩袂再來看珍叢未謝夢雲已遠

吳縑蜀錦新詩能換十年事暗驚雨散問  
山陽舊侶到此更誰過空鄰笛繞花吹徧  
綺寮怨

宣武城南夜集感事和清真

白眼看天如醉夢雲誰喚醒糝綺陌舞絮狂  
塵傷春淚漫灑新亭微茫西山一角滄波底  
日落山更青但怪他片石無言冤禽恨抵死  
填海盈 曠望去天幾程珠宮舊事仙才枉  
說飛璫月冷風清羽衣譜歛愁聽茗茗鳳樓  
殘點獨立盡五更情漂花滿城東風不到處

花又零

還京樂

戊戌春應都堂試到京聞有客述焦山  
僧樓詞扇見者輒吟翫不去手蓋余甲  
午秋感事作也今又將騎款段出國門  
放歌於東南山水間不復與僮兒爭道  
芻苦李矣和清真韻感而賦此

放愁地說與滄江舊曲誰重理縱翠紗籠句  
白雲笑我仙才空費又故山歸後殘春事與  
浮名委鎮斷送明日陌上看花閒淚向清

波底見文章流錦名花訴盡東風零落舊味  
堪嗟冶葉倡條傷凡門豔數桃李恨迢迢拌  
玉劒埋雲金刀斷水料得西樓月窺人還自  
憔悴

夜飛鵲

出南郭門望西山和清真別情

城南有情月知我悽其臨別更送清輝吟邊  
白髮已愁盡京塵依舊緇衣煙霄曠迴眺看  
仙山樓閣海戍旌旗長安夢短過津亭酒醒  
偏遲身似十年江燕簾幕易秋風殘社空

歸休問烏衣故國尋常陌巷重到應迷數峰  
缺處倩蒼雲補向天齊但紅桑成畝青蕪變  
海弱水還西

驀山溪

半塘翁嘗愛誦美成此曲與瞻園同年  
連和之今別翁浹旬已沽口樓居連雨  
不寐兼聞梧州亂耗爰次韻寄懷不獨  
旅逸之感也

吟邊鐙火夢熟城南路歸騎每侵晨月初沈  
西山缺處殘牋滿袖都是別君詞空愁語休

延伫酒醒天涯去 飄零到此客枕高樓雨  
鶴唳似驚風渺甌蠻瘴江戰鼓扁舟不繫一  
夜故園心杯未舉愁先注白髮緣千縷

月下笛

戊戌八月十三日宿王御史宅夜雨聞  
鄰笛感音而作和石帚

月滿層城秋聲變了亂山飛雨哀鴻怨語自  
書空背人去危闌不爲傷高倚但腸斷衰楊  
幾縷怪玉梯霧冷瑤臺霜悄錯認仙路 延  
伫銷魂處早漏洩幽盟隔簾鸚鵡殘花過影

鏡中情事如許西風一夜驚庭綠問天上人間見否漏譙斷又夢聞孤管暗向誰度

鶯啼序

秋感和夢窗豐樂樓韻

滄洲半殘畫稟認河山錯綺自槎客豔說仙瀛浪疊愁滿空際蜃嘘起樓臺幻境金銀夜氣渾無霽怪塵昏蠻海驚鳶跼影都墜陳迹蒼黃對酒看劍向青天漫倚漢宮月猶過邊亭墮榆飛盡寒翠最銷凝昆池劫墨石鱗泣秋稜荒水閱年涯三淺蓬萊此身何世



長安似弈局外樵柯睡境正深美幽恨切數  
聲嘯鳥夢裏誰見覆雨翻雲楚天疑事西山  
縹緲香霏一片玉龍哀變清商曲漏沈沈燭  
背簾垂地拋殘舊舞霓裳獨坐繁霜淚花溼  
紅縵緯 宮槐翳日苑柳扃煙念鳳樓久遲  
但夢繞瑤池仙步鶴怨猿猜望斷層城玉梯  
十二驕雲滿眼森森冠佩江關投老詞賦客  
歎京塵空染憂時袂傷心孤燕巢林亂葉迷  
歸夕陽故里

秋思耗

半雨樓聞雁和夢窗

衰帽西風側驟雁聲催送暮城寒色燈院雨  
昏晚花中酒愁浸腸窄倚歌扇高樓四絃和  
淚訴掩抑見數峰江上碧想故國雲橫幾行  
歸盡又作早秋南旅有情堪憶殘夕檐鈴  
斷滴喚素娥澹洗鉛飾怕聞鄰笛明朝窺鏡  
鬢華暗白誤舊約青鸞信乖春夢如過翼念  
遠客應慣識漫歲晚稀逢重門無字寄得恨  
隔霜榆塞北

憶舊遊

己亥五日浮家西崦信宿石壁精舍見  
湖壩漁家垂燈疊鼓饒有節物感時賦  
此

正梅風轉溽麥浪吹涼晴泛吳橈未了尋幽  
興賦枇杷晚翠一掬金拋五湖料理三畝多  
事誤青袍悵聽水燈前看山枕底夢境苕苕  
蕭條舊蘭若問煙雨樓臺誰換南朝牘有  
蒼黃壁壓頗黎萬頃斷劫難銷淒其五日情  
事殘醉虎山橋歎滿地滄波漁舟夜笛何處  
招

浣溪紗

從石樓石壁往來鄧尉山中

一半梅黃雜雨晴  
虛嵐浮翠帶湖明  
閒雲高鳥共身輕  
山果打頭休論價  
野花盈手不知名  
煙巒直是畫中行

慶春宮

橋西新營後溪  
植援雜花幽樹  
經秋成陰  
時有冷客登樓  
釀飲蕭然託寄  
輒付  
愴歌

窗岫遙青簾波空翠  
卧臨畫裏江城斜月琴

牀低花衣桁枕溪疏綺多明幾枝霜觴暮寒  
迸西樓雁聲小闌紅袖倚徧珍叢玉笛誰橫  
歌塵一片淒清別岸垂楊曾見藏鶯屏燭  
秋啼鏡花春影賦愁空費閒情舊遊吟境夢  
雲隔蓬萊幾程仙才自惜莫枉山中猿鶴知  
名

滿庭芳

西館新陰花枝可撚勿勿不知春過半  
已

行錦花陰隔紗春語好風香出梅梢翠塵簾

捲新樹過人高休惜年芳晚晚滄洲夢輕付  
吳橈低回處江南舊燕零落謝堂巢東風  
還似客梨雲粉冷蕙雪紅銷近清明歌酒愁  
欠誰澆一卧西樓聽雨閒情倦別枕笙簫前  
遊續山塘載月斟酌過橫橋

前調

江上餞春

南雪蘭襟東風茸帽舊情人比花狂江城畫  
裏樓閣隱垂楊可奈春霏冉冉都換了新綠  
池塘銷魂地殘紅有恨還作燕泥香年年

春盡日疏鐙聽雨總是他鄉縱清歌緩客怕  
近離觴早識芳心一點收拾與蜨粉蜂黃今  
宵夢吳波半翦應附北歸航

沁園春

虎山橋重泊秋晚登眺

衰柳西灣冷楓南塢秋橫野航見秦眉天鏡  
乍驚離合越鬟水枕能令低昂殘霸空丘故  
宮成沼贏得漁樵買醉場清尊對牘一螺頑  
碧虎老山荒 蒼涼重樓鷗鄉漸紅葉吹寒  
零雁行記五湖雪權探梅詩瘦兩崦霜籠報

橘書香寸岫仙雲尺波塵海一笑登高理舊  
狂移家好信石芝堪采勝賦滄浪

龍山會

虎丘作重九時自光福里迴舟和君特  
載酒雙清之作

塔影窺林罅落雁汀煙畫艣霜花亞虎山橋  
上月移夢近還過雲泉亭下衰帽側高秋墮  
巾趁山容淡冶最銷凝吳篷暮雨歌前暗灑  
因憶舊節題香蹋醉花街倚少年驕馬劒  
遊狂態盡珠箔墜獨自飄鐙殘夜人事水東



西凭高淚流紅迸瀉漫歸吟冷楓牘有一瓢  
詩挂

虞美人

題紅橋歸騎畫扇

澹煙洗得春山瘦眉嫵從誰鬪橫橋西畔小  
桃枝一自插花人去怨開遲馬蹏芳草經  
遊地重到銷魂易紅樓長占柳陰陰只是柳  
條不繫少年心